

**TEKS UCAPAN ALUAN**  
**Y. BHG. PROF. Ir. DR. GHAZALI OMAR**  
**MENJALANKAN FUNGSI NAIB CANSELOR UTeM**

---

**ANUGERAH AKADEMIK UNIVERSITI 2020**

*3/11/2021, 3.00 pm, Auditorium FKP*

*Bismillahirrahmanirrahim*

Terima kasih kepada Pengacara Majlis

**Yang Berbahagia Prof. Dr. Zulkiflie bin Ibrahim**

Timbalan Naib Canselor (Akademik dan Antarabangsa)

**Yang Berbahagia Datuk Dr. Sabri bin Mohamad Sharif**

Timbalan Naib Canselor (Hal Ehwal Pelajar)

Penolong-Penolong Naib Canselor, Pegawai-Pegawai Kanan Universiti, Jawatankuasa Pelaksana AAU 2020, para penerima AAU 2020, Hadirin hadirat yang dihormati sekalian.

Assalamualaikum Warahmatullahi Taala Wabarakatuh dan Salam Sejahtera.

1. Alhamdulillah, setinggi-tinggi kesyukuran kehadiran Allah SWT kerana dengan limpah rahmat dan inayahNya, dapat kita bersama-sama menganjurkan Majlis Anugerah Akademik Universiti 2020 pada petang ini.

2. Walaupun AAU 2020 kali ini dianjurkan agak lewat dari perancangan asal di samping penganjurannya dalam skala yang sederhana, namun saya yakin, semangat AAU ini masih kekal sama seperti tahun-tahun sebelum ini.
  
3. Bagi pihak Universiti, saya merakamkan jutaan terima kasih kepada semua pihak yang terlibat dalam menjayakan Majlis Anugerah Akademik 2020, khususnya kepada Panel Penilai Anugerah Akademik Universiti di peringkat Universiti, Panel Penilai Teknikal, dan Jawatankuasa Pelaksana Majlis, yang telah bertungkus-lumus memastikan perjalanan majlis

penganugerahan ini lancar sepertimana yang dihasratkan oleh pihak Universiti.

4. Saya juga ingin mengucapkan tahniah dan syabas kepada semua penerima anugerah yang akan diumumkan sebentar lagi. Semoga anugerah yang diterima pada hari ini, akan menggalakkan lagi keserjanaan di kalangan ahli akademik UTeM, dan seterusnya meningkatkan lagi motivasi diri untuk terus cemerlang, gemilang, dan terbilang pada masa akan datang.

## **Hadirin dan Hadirat Sekalian,**

5. Ahli akademik merupakan golongan ilmuan terpenting yang bukan sahaja berperanan sebagai murabbi kepada diri sendiri dan siswa, namun turut menggalas tanggungjawab dalam menyuburkan ilmu dan kepakaran yang mampu menyumbang kepada kelestarian pembangunan global masa kini.

6. Bagi menzahirkan tuntutan ini, ahli akademik hendaklah senantiasa bersedia memperkasakan keupayaan diri, meningkatkan daya kompetensi diri menerusi penerokaan ilmu-ilmu baharu dan mengamalkan budaya inovasi dan kreativiti dalam melaksanakan amanah yang diberi.
  
7. Saya amat yakin, UTeM sebagai sebuah universiti teknikal, mempunyai potensi yang amat besar untuk menggungguli bidang pendidikan tinggi teknikal atau TVET, disamping menjadi hub rujukan utama bagi kesejahteraan masyarakat, dan pembangunan industri serta negara.

8. Hal ini kerana, saya dapat merasakan, setiap daripada warga Universiti ini, terutamanya dari kalangan ahli akademik sendiri, memiliki kredibiliti diri dan kepakaran tersendiri, yang mampu melonjakkan lagi kegemilangan UTeM ke aras yang lebih terbilang.
9. Bagi merealisasikan hasrat murni ini, kita semua hendaklah berganding bahu dan melunaskan tanggungjawab yang telah diamanahkan sehabis baik, dan bergerak ke arah yang sama sebagai satu pasukan UTeM bagi memperkasakan lagi momentum kecemerlangan yang telah diraih selama ini.



## **Hadirin dan hadirat sekalian,**

10. Di sebalik kejayaan yang telah diraih selama ini, ingin saya berpesan, agar kita tidak mudah rasa selesa dengan apa yang telah dimiliki. Perjalanan dalam melonjakkan kecemerlangan UTeM sebaris dengan Universiti ternama masih lagi jauh dan pastinya pelbagai cabaran yang perlu diharungi secara bersama.

11. Sepertimana yang selalu saya kongsiikan sebelum ini, hasrat universiti ini adalah untuk melahirkan lebih ramai ilmuwan teknologi yang berupaya menjadi penyumbang solusi terbaik bagi melengkapkan ekosistem akademia, industri dan masyarakat, yang akhirnya menyumbang terhadap pembangunan yang lebih lestari.

12. Selain itu, sasaran Universiti yang diterjemahkan menerusi UTeM's Seven Strategic Goals 2021 - 2025, peletakan aras yang lebih cemerlang dalam ranking universiti, pengukuhan pengurusan dan pentadbiran Universiti yang lebih mantap dan efisien, memerlukan penglibatan yang lebih inklusif dari semua warga Universiti.
  
13. Insya Allah, dengan usaha bersepadu dari semua pihak, saya yakin, segala apa yang di aspirasikan ini mampu beroleh kejayaan, dengan syarat kita semua perlulah bertindak sekarang dengan mentransformasikan kredibiliti diri ke tahap yang lebih baik.

## **Hadirin dan Hadirat Sekalian,**

14. Saya percaya, penerima anugerah bagi setiap kategori yang bakal diumumkan seurus selepas ini merupakan mereka yang telah menyumbang dan menunjukkan prestasi cemerlang dalam bidang masing-masing.
  
15. Difahamkan, pemenang setiap kategori dan dua penerima sugu hati tertinggi yang melepasi titik ambang, bakal menerima insentif mengikut nilai yang telah ditetapkan. Namun, ingin saya tekankan di sini, bukanlah nilai anugerah yang menjadi ukuran.

16. Namun sejauh mana komitmen dan sumbangan yang diberikan oleh setiap ahli akademik UTeM untuk memperkembangkan keserjanaan ilmu, selain melonjakkan reputasi universiti yang lebih terserlah di peringkat nasional mahupun antarabangsa.

**Hadirin dan Hadirat Sekalian,**

17. Sebelum akhiri ucapan, saya mengambil kesempatan di sini untuk mengucapkan setinggi-tinggi penghargaan dan terima kasih kepada semua warga universiti khususnya ahli akademik yang telah memainkan peranan penting dan memberikan

sumbangan terbaik dalam aspek akademik, penyelidikan, pembangunan bakat insan yang cemerlang dan lain-lain lagi.

18. Saya juga berharap agar penerima Anugerah Akademik Universiti yang bakal diumumkan sebentar lagi akan terus menjadi inspirasi, pendorong, penggerak dan pemangkin kecemerlangan kepada ahli akademik lain dalam mencipta lebih banyak kejayaan di masa hadapan.

Seni seramik, hiasan peragaan,  
Menjadi jualan, acara tradisi,  
Anugerah akademik, simbolik penghargaan,  
Mencipta keunggulan, mencapai aspirasi.

Sekian, *wabilahitaufik walhidayah wassalamualaikum*  
*warahmatullahi taala wabarakatuh.*